

FADIL NURKIĆ: „ORUŽJE BOSANSKOG OTPORA“

Knjiga „Oružje bosanskog otpora“ autora Fadila Nurkića ima za cilj da ukaže na temeljne fenomene bosanskohercegovačkog odbrambenog rata: način borbe, ali i oružje koje se primjenjivalo i kojim su se branili temeljni principi jedne pravedne borbe u nametnutom ratu od 1992. do 1995. godine. Autor Fadil Nurkić u monografskom zahvatu želi da prepozna i identificira, u najpoštenijem i najzahvatnijem mehanizmu, svo oružje koje se susretalo u ratnim formacijama Armije Republike Bosne i Hercegovine.

Iako autorovo stručno obrazovanje nije historičarsko, to mu nimalo nije kompleks, nego obrnuto. To mu nije umanjilo interes i znatiželju, kojih, nažalost, u novije vrijeme često nema, posebno kada je riječ o brojnim fenomenima odbrane Bosne i Hercegovine. Zato on pojačanim naporom i sa željom da obradi interesantnu temu, pokazuje kako posjeduje zavidnu rutinu, koja svakom dobronamjernom imponira, a njega samog odlikuje izuzetnim kvalitetom i sposobnošću da u moru nepoznanica vidi temeljnu pretpostavku i osnovu za jedno novo tumačenje rata u Bosni i Hercegovini.

Treba posebno potcrtati ovu *neobičnu* zanesenost i opsjednutost Fadila Nurkića temama bosanskohercegovačkog rata, posebno oružja, koje je slika i prilika brojnih nedaća i problema u funkcioniranju sistema odbrane. Ali, uz izuzetan napor i dovitljivost, posredno i neposredno, očito je da Nurkić vidi puteve i pravce odbrane Bosne i Hercegovine u ratu od 1992. do 1995. godine, što će biti od izuzetne pomoći i njemu kao učesnika rata, ali i svim budućim istraživačima koji budu otvarali pitanje rata u vremenu od 1992. do 1995. godine.

U knjizi „Oružje bosanskog otpora“ primjetljiva su pedantna i iscrpna traganja za mnogim vrstama naoružanja, kojeg više skoro nigdje nema. Autor se koristi već poznatom upornošću da sazna ili

dode u posjed svega onoga što je bilo od pomoći za odbranu države.

Rukopis „Oružje bosanskog otpora” zanimljiv je i sa stručnog stanovišta - to je prvi put u novijoj bosanskohercegovačkoj historiografiji da se o jednom, uvjetno alternativnom, dijelu historije ponudi cjelovit, baš u pravom smislu te riječi, totalan pogled na sve zanimljivosti, vrijednosti i karakteristike oružja koje se koristilo u jednom ratu.

Treba ponoviti - rukopis se donekle obračunava sa jednom, nazovimo to tako, bosanskohercegovačkom bolešću, da se o ratu od 1992. do 1995. godine i njegovim manifestacijama govori otvoreno, argumentirano, sa stručnim potvrdama i mišljenjima kvalificiranih istraživača, da se govori o principima odbrane, njenim rezultatima, a da se ne zadire u ovještalo. Vidljive su vrijednosti ovog rukopisa, pravci, ali i problemi. Zanimljivo da je skoro cijeli rukopis rezultat samostalnog istraživanja, kao i hodoloških provjera svega što je bilo tajanstveno i nepoznato o pitanju odbrane Bosne i Hercegovine.

Otvarajući prostor mnogim pretpostavkama, rukopis skoro uvijek ima za cilj da ukaže na brojne *čudne* načine kako se do oružja dolazilo, kako se ono sklapalo i koristilo. Autor skoro uvijek nastoji da ne povrijedi mnoge principe borbe, ali i one koji su to oružje koristili. Vidljivo je da suvereno vlada činjenicama, slaže ih hronološki, tačno, precizno, nudi ih kao argument u tekstu, te se u mnogim dijelovima to vidi kao jedna *alternativna povijest* odbrane Bosne i Hercegovine u ratu od 1992. do 1995. godine, načina kako se u tom haosu opstalo i čime se branilo.

Preporučujući za čitanje knjigu “Oružje bosanskog otpora” autora Fadila Nurkića, treba reći da se radi o izuzetnom tekstu, koji ima svoju vrijednost, težinu i zahtjevnost. Pojavom ove knjige znanja o oružju u bosanskohercegovačkom odbrambenom i oslobodilačkom ratu donekle će biti potpuna. Bez pretencioznosti, dobijamo siguran vodič i parametar jednog vrijednog i zanimljivog zanosa.